



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDISIÁL

## ***Komunikadu Imprensa***

***30 Abril 2013***

### **Prezidente da Repúblika enkoraza JSMP tau matan ba produtividade servisu instituisaun judisiáriu no lejislativu**

Iha Kinta feira 25 Abril 2013, Ekipa JSMP (*Judicial System Monitoring Programa*) hasoru malu ho Prezidente da Repúblika, Taur Matan Ruak, iha Palasio Prezidente da Repúblika, Aitarak-laran.

Objetivu husi audiénsia ne'e mak atu entrega JSMP nia relatóriu observaun jerál ba setór justisa no relatóriu anual Observasaun Parlamentár 2012. Relatóriu ne'e diskuti kona-ba progresu no dezafiu sira iha setór justisa no lejislativu durante tinan 2012 nia laran.

Aleinde ne'e JSMP mos uja oportunidade ne'e deskuti kona-ba prinsipiu separasaun podér, independensia instituisaun judisiáriu, investimentu ba setór judisiáriu no alegasaun kontra alegasaun ne'ebé mosu iha instituisaun judisiáriu sira relaciona ho kazu sira ne'ebé akontese durante ne'e. Tanba asuntu hirak ne'e, liga direktamenta ho konfiansa públiku ninian ba kredibilidade instituisaun judisiáriu sira.

"JSMP husu ba Prezidente hodi uza nia kbi'it no kapasidade konstitusionál hodi asegura diskursu no komunikasaun politiku ne'ebé la kontra-produtivu entre orgaun soberania sira, nune'e la prejudika esforsu no komitmentu entidades no elemente sosiedade tomak hodi hametin demokrasia no estadu-de-direitu iha Timor Leste, ". dehan Diretór ezekutivu JSMP, Luis de Oliveira Sampaio.

Ba preokupasaun hirak ne'e, Prezidente haktuir katak Prezidente sei rejista hotu preokupasaun hirak ne'e, no sei apresenta hikas ba orgaun estadu sira inklui ho Primeiru Ministru, depende ba asuntu ne'ebé JSMP ható'ó no koloka durante audiénsia ne'e.

Prezidente husu ba JSMP atu identifika pontus importante sira ne'ebé JSMP konsidera hanesan problema inklui rekomendasaun no bele diskute ho Asesora Juridiku Prezidente da Repúblika hodi nune'e bele halo *follow up* ho orgaun estadu sira. Prezidente mos husu atu JSMP kontinua tau matan ba produtividade servisu membru parlamentu sira inklui servisu autór judisiáriu sira, hodi nune'e bele asegura prosesu desenvolvimentu ida ne'ebé fo benefisiu ba povu Timor tomak.

Audiénsia ne'e enserra hodi entrega publikasaun sira JSMP nian hanesan relatóriu annual Observasaun Parlamentár no Observasaun Setór Justisa 2012.

Atu hetan informasaun kle'an favor kontaktu direktamente:

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883  
[www.jsmp.tl](http://www.jsmp.tl)